

16 JAN 1998

Mahathir-Camdessus

PENGARAH URUSAN IMF ADAKAN PERBINCANGAN DENGAN DR MAHATHIR

KUALA LUMPUR, 16 Jan (Bernama) -- Pengarah Urusan Tabung Kewangan Antarabangsa (IMF) Michel Camdessus mengadakan pertemuan dengan Perdana Menteri Datuk Seri Dr Mahathir Mohamad hari ini untuk membincangkan antara lain masalah ekonomi yang dihadapi beberapa negara Asia kini, termasuk Malaysia.

Pertemuan itu diadakan di Jabatan Perdana Menteri.

Semalam Dr Mahathir berkata Malaysia akan membincangkan pendapatnya mengenai krisis kewangan sekarang dengan Camdessus.

Kuala Lumpur telah berkata ia tidak berhasrat untuk meminta bantuan IMF.

Camdessus yang tiba di sini semalam untuk lawatan dua hari dijadual mengadakan pertemuan dengan para pegawai Bank Negara kemudian. Beliau mengadakan perjumpaan dengan para pegawai Perbendaharaan sebelum itu.

Camdessus telah mengadakan perbincangan dengan Timbalan Perdana Menteri dan Menteri Kewangan Datuk Seri Anwar Ibrahim di Perbendaharaan semalam.

Camdessus sedang dalam rangka lawatan ke beberapa negara Asia termasuk Korea Selatan dalam usaha mengurangkan krisis ekonomi yang dihadapi rantau ini.

Semasa di Indonesia semalam, Camdessus dan Presiden Indonesia Suharto menandatangani satu memorandum mengenai pencepatan mengadakan pembaharuan-pembaharuan dalam menangani kegawatan kewangan Indonesia.

Memorandum itu menyatakan langkah-langkah baru yang harus dilakukan Indonesia di bawah pakej bantuan sejumlah US\$43 bilion yang dipersetujui dengan IMF Oktober lepas.

Camdessus akan berlepas ke Singapura lewat hari ini. -- BERNAMAw
ES RON